


www.BibleForChildren.org

मत्ती 26



फसह तिहार कर
छव दिन पहिले ईसू
हर बैतनिय्याह गांव में
आईस, जिहां लाजर रहत
रहीस, जेके ला ईसू हर मरल
में ले जीयाए रहीस। तेकर
मरियम हर आधा लीटर,
जाटामासी कर ढेरेच महंगा
आंतर तेल ला लाएन के,
ईसू कर गोड़ में लगाईस अऊ अपन
चुंदी ले ओकर गोड़ ला पौंछीस अऊ
ओ आंतर तेल कर खुसबू ले घर भेर
हर गमके लागीस।



तेकर बारहों चेला में ले एक झन यहूदा इसकरोती हर ईसू के
धरूवाए बर, मुख याजक मन जग गईस। ओमन एला सुईन
के ढेरेच खुस होईन अऊ ओके रूपिया
देहे बर राजू होए गईन, तेकर
यहूदा ईसू ला धरूवाए बर
मोका खोजे लागीस।



जईसना ईसू हर अगींया देहे रहीस,
वईसनेच चेला मन करीन अऊ फसह
तिहार कर भोज ला तियार करीन।
जब ओमन खात रहीन, त ईसू हर रोटी
लेहीस अऊ परमेस्वर ला धनबाद देके
ओला टोरीस अऊ अपन चेला मन ला
देके कहीस, “लेआ अऊ खा, एहर मोर
देह लागे।”



तेकर ओहर अंगूर कर रस भरल कटोरा
ला लेहीस अऊ परमेस्वर ला धनबाद
देहीस अऊ चेला मन ला ए कहिके
कटोरा ला देहिस, “एमे ले तुमन सब
झन पीया। काबरकि एहर मौर लहू लागे
जेकर चलते, परमेस्वर हर तुमन कर
संगे ओकर करार ला पका करथे, जेहर
एकर बर रिकोवल जाथे, कि ढेरच
मईनसे मन ला पाप
कर छमा मिले।”



तेकर ईसू हर कहीस, “समोन, ए समोन! सुन, सैतान हर तुमन ला गंहू कस पछूरे बर मोर जग ले मांएग लेहीस हवे। बकिन समोन, मंए तोर बर पराथना करे हों, तेमेकि तोर बिस्वास हर झईन डोले, अऊ जे घनी तंए पछ्ताए के मोर जग वापिस आबे, त अपन भाई मन ला बिस्वास में बजर करबे।”



फेर ओहर ईसू जग कहीस, “ए परभू, मंए तोर संगे जेहल में
जाए बर, अऊ मरोच बर तियार हों।” ईसू हर कहीस, “पतरस,
मंए तोके कहथों कि आएज मुरगा बासे कर आगू, तंए तीन
दाएर इनकार कएर के कहबे, कि मंए ओके ला नई जानों।”



तेकर ईसू हर अपन चेला मन
कर संगे, गतसमनी नांव कर
एगोट जघा में गईस अऊ
ओमन ला कहीस, “तुमन
इहां बईठे रहा तब ले मंए
उहां पराथना करे बर जाथों।”
अऊ कहीस, “ए अब्बा, ए मोर
दाऊ, तोर ले तो सब कुछ होए
सकथे, ए दुख कर कटौरा ला
मोर जग ले हटाए दे, तबो ले
मंए जईसना चाहथों ओईसना
झईन होए, बकिन जईसना तंए
चाहथस वईसना होए।”



तेकर यहूदा हर तनिक रोमी सैनिक, अऊ तनिक मंदिर कर
सिपाही, जेमन ला मुख याजक अऊ फरीसी मन भेजे रहीन,
ओमन ला लेके ओ बूगीचा में आईस, ओमन
लालटेन, मसाल अऊ हथियार मन ला धरे रहीन।
अऊ चेला में ले एक झन हर महायाजक
कर सेवक कर, जवनी कान ला
तलवाएर में काएट देहीस।
ते घनी ईसू हर कहीस, “रहे
देआ, बस होए गईस;” अऊ
ईसू हर ओकर कान ला छुईस
अऊ ओके ला बढिहां कएर देहीस।



तेकर ओमन ईसू ला धरीन अऊ ओके महायाजक कर घरे ले
गईन; बकिन पतरस हर दुरीहां में होए के, ओमन कर
पाछू-पाछू जात रहीस। जब ओमन
अंगन कर मझारे, आगी
बाएर के एक संगे बईठ
गईन, त पतरस हर
ओमन कर मझारे
जाए के बईठ गईस।




महायाजक कर एक
झन सेवक ओजग रहीस,
जेकर कान ला पतरस काटे
रहीस, ओहर ओकर घराना
कर रहीस। ओहर पतरस जग
पूछीस, “का मंए तोके ईसू कर
संगे बारी में नई देखे रहें?” तेकर
पतरस हर फेर इनकार करीस अऊ
तुरतेंच मुरगा हर बासीस। तेकर
पतरस हर अंगन ले बाहरी कती
गईस, अऊ कलेप-कलेप के रोईस।




तेकर सब दरबार कर मईनसे मन उईठ
के, ईसू ला राएजपाल पीलातूस जग ले
गईन। राएजपाल पीलातूस हरे ओके ला
पूछीस, “का तंए यहूदी मन कर राजा
लागस?” ईसू हर कहीस,
“तंहीच तो कहत हस।”
बकिन राएजपाल पीलातूस
हर ईसू ला छोड़े बर करत
रहीस, तेकर ले मईनसे मन
ला फेर समझाईस, बकिन

ओमन किरलाए के कहे लागीन,


“ओके ला कुरुस में चघाए दे, ओके
ला कुरुस में चघाए के मरुवाए दे।”




तेकर पीलातूस हर ईसू ला कूरुस में चघाए
के मरवाए बर, ओमन कर हाथे सौएप
देहीस। “तेकर ओमन ईसू ला ले गईन।
अऊ ओहर अपन कूरुस ला डोएह के,
बाहरी निकलीस अऊ ओ जघा में गईस,
जेला ‘खोपड़ी कर जघा कथें’ अऊ इबरानी
भासा में एला ‘गुलगुता’ कथें।”



“ओजग ईसू कर संगे ओमन अऊ दुई झे
मईनसे मन ला कुरुस में चघाईन,
एक झन ला ओकर जवनी कती,
अऊ दूसर झन ला ओकर
डेरी कती, अऊ
ईसू ला ओमन
कर मझार
में चघाईन।”



काबरकि बेर हर इंजोर नई देहत रहीस। अचाकन मंदिर कर
परदा हर, मझार ले चिराए के दुई टुटका होए गईस,
तेकर ईसू हर जोर से चिकेर के कहीस, “ए दाऊ, मंए अपन
आत्मा ला तोर हाथ में सौंपत हौं।”
अऊ एकस कहीके ईसू
हर मएर गईस।



त अरमतियाह कर रहोईया यूसुफ हर
आईस, जेहर बड़खा सभा कर सदस
रहीस अऊ परमेस्वर कर राज
कर डगर देखत रहीस। ओहर
हिमेत कएर के पीलातूस
जग गईस अऊ ईसू
कर लास ला मांगीस।
तब यूसुफ हर एगोट
मखमल कर चदर
ला

बेसाए के लानीस
अऊ ईसू कर लास
ला उताएर के ओही
चदर में लपेटीस अऊ
एगोट चटाएन कर
कोड़ल मठ में राखीस
अऊ मठ कर दुरा में
एगोट पखना ला ढांप
देहीन।



ओकर दूसर दिन, जेहर तियारी कर दिन
कर पाछू कर दिन रहीस, मुख याजक
मन अऊ फरीसी मन
पीलातूस जग गईन। अऊ
कहीन, “ए महाराज हमके
ला सुरता हवे कि, ओ
धोखा देवईया हर
जीयत रहीस, त कहे
रहीस कि तीन दिन
कर पाछू

मंए
जी उठहूं।”



तब ओमन गईन
अऊ मठ कर पखना ऊपरे
मोहर लगाईन अऊ पहरादार
मन ला बईठाए के ओमन
मठ कर पहरा करीन।






पबितर दिन कर पाछू, एतवार कर बड़े
बिहाने मरियम मगदलीनी अऊ दूसर
मरियम मठ ला देखे बर गईन।
अचाकन एक बड़े भारी भुईडोल
होईस, काबरकि परभू कर
एगोट दूत हर सरग ले
उतरीस अऊ मठ कर
पखना ला ढलगाए के
ओकर उपरे बईठ
गईस।

पहरादार मन ओकर
डरे थर-थर कांपे
लागीन अऊ मरल
कस होए गईन।




तेकर सरगदूत हर सवांगीन मन ला
कहीस, “झईन डरावा, काबरकि मंए
जानत हों कि तुमन ईसू ला
खोजत हा, जेला कुरूस उपरे
चघाल गए रहीस। ओहर
एजग नईए ‘ओहर जी
उठीस हवे, जेकस कि
ओहर कहे रहीस,
आवा अऊ ओ जघा
ला देखा



जिहां ओके राखल
गए रहीस।”



तेकर ओ सवांगीन मन, तुरतेंच मठ ले चल
देहीन। ओमन डराए गए रहीन अऊ खुसी ले
भएर गए रहीन, त ओमन चेला मन
ला बताए बर कदीन। ओमन कर जाए
घरी हबक ले ईसू हर ओमन ठन
भेंटाईस अऊ कहीस, “खुस रहा।”
ओमन ओकर जग आईन अऊ
गोड़े गिर के ओके जोहारीन।





तेकर पाछू ईसू गियारहो चेला मन ला देखार देहीस, जब ओमन खाए बर बईठे रहीन अऊ ओहर ओमन कर अबिस्वास अऊ मन कर ढींट कर चलते, ओमन ला घड़काईस। काबरकि ओमन जी उठे कर पाछू ओके देखीन, तबो ले बिस्वास नई करे रहीन। परभू ईसू ओमन जग ए सब गोएठ ला गोठियाए कर पाछू, सरग मै उठाए लेहल गईस अऊ परमेस्वर कर जवनी कती बईठ गईस।



काबरकि परमेस्वर हर, दुनिया कर
मईनसे मन जग एतना मया करीस, कि
ओहर अपन एकेच ठे बेटा ला दे देहीस,
तेमेकि जे कोनो ओकर ऊपरे बिस्वास
करही, ओहर नास नई होही,
बकिन अमर जिनगी पाही।



रोमी 3:23

काबरकि सब झेमन पाप करीन हवें, अऊ परमेस्वर कर महिमा
ले दुरिहां होए गईन हवें।

रोमी 6:23

काबरकि पाप कर मजदूरी तो मिरतु लागे, बकिन परमेस्वर कर
बरदान, हमर परभू मसीह ईसू कर जरिए अमर जिनगी लागे।

इबरानी 9:27

जेकस कि मईनसे मन बर एक बार मराई अऊ ओकर बाद ओकर
नियाओ होवाई तय हवे।



इफिसी 2:8,9

काबरकि परमेस्वर हर अपन किरपा ले, बिस्वास कर द्वारा तुमन कर उद्धार करीस हे अऊ एहर तुमन कर अपन कर्ती ले नई होईस हवे, बलकि एहर परमेस्वर कर दान लागे। उद्धार हर मईनसे कर अपन करम करे कर चलते नई होईसे, तेमैकि कोनो मईनसे हर घमंड झईन करे।

रोमी 10:9,10

अगर तंए अपन मूंह ले कबूल करथस कि ईसू हर मोर परभू लागे अऊ अपन मन में बिस्वास करथस कि परमेस्वर हर ओके मरल में ले जियाईस, त तंए फुरोंच में उद्धार पाबे। काबरकि जे कोई हर अपन हिरदय में बिस्वास करथे, ओहर परमेस्वर कर नजर में बेकसूर बनथे अऊ अपन मूंह ले, बिस्वास ला कबूल करे कर चलते उद्धार पाथे।



यूहन्ना 3:16,17

“काबरकि परमेस्वर हर, दुनिया कर मईनसे मन जग एतना मया करीस, कि ओहर अपन एकेच ठे बेटा ला दे देहीस, तेमेकि जे कोनो ओकर ऊपरे बिस्वास करही, ओहर नास नई होही, बकिन अमर जिनगी पाही। परमेस्वर हर अपन बेटा ला संसार में एकर बर नई भेजीस, कि ओहर संसार ला दंड दे, बकिन एकरले भेजीस कि संसार हर ओकर द्वारा उद्धार पाए।”

1 यूहन्ना 5:11-13

ओ गवाही एहर लागे कि परमेस्वर हर हमके ला अमर जिनगी देहीस हे, अऊ ए जिनगी हर ओकर बेटा में हवे। जेकर जग परमेस्वर कर बेटा हवे, ओकर जग अमर जिनगी हवे अऊ जेकर जग परमेस्वर कर बेटा नईए, ओकर जग अमर जिनगीयोच हर नईए। जेमन परमेस्वर कर बेटा कर नांव में बिस्वास करथा, तेमन ला मंगे ए बात एकर बर लिखत हों, ताकि तुमन जाएन लेआ कि अमर जिनगी तुमन कर हवे।



मत्ती 26-28; लूका 22-24; यूहन्ना 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Surgujia NT (sgj) © (Active) Wycliffe Bible
Translators, Inc. All rights reserved.

<https://live.bible.is/bible/SGJWIN/MAT/1>

©2026 Bible for Children, Inc.

www.M1914.org

www.bibleforchildren.org

